



# KOPI PAHIT

Ustaz Taha Suhaimi menganjurkan supaya meniru orang-orang lain agama tatkala hendak kahwin. Katanya kalau mau kahwin dalam masa memilih tunang hendaklah berkenal-kenal dahulu. Kedua-duanya boleh berjalan-jalan ke tepi laut umpamanya dengan syarat diiringi oleh seorang perempuan tua. Orang bertanya apakah orang tua itu mau jadi “pemerhati” atau mau jadi “pengadil” wasit – kata orang Indonesia atau pun mengikut istilah yang lebih kasar – mengikut bahasa pasar mau jadi... barua. Kita tak dapat menjawab hanya kita dapat mengucapkan *wa Allāhu a 'lam* – Tuhan yang sama mengetahui!

\* \* \*

UMNO Singapura telah mengadakan permohonan kepada Yang di-Pertuan Negara supaya orang-orang yang masih ditahan dalam perkara Natrah dibebaskan. Permohonan seperti ini masa dahulu kalau dihadapkan kepada Gabenor dan kalau di Persekutuan dihadapkan kepada Yang di-Pertuan Agong maka kedua-dua pegawai tinggi ini biasanya yang menjawab tetapi jawapan yang diterima oleh UMNO adalah dari Kementerian Kehakiman. Dengan jawapan ini orang-orang bertanya-tanya apakah ada lagi erti yang di-Pertuan Negara kalau parti siasah yang memerintah mesti menjawab bagi pihaknya? Demokrasi Bung!

\* \* \*

*Allowance* pegawai-pegawai kerajaan telah kena potong. Kerajaan terus membuat langkahnya apabila ia memegang kekuasaan. Tatkala kesatuan pegawai-pegawai yang berkenaan meminta tangguh untuk mengambil kuasa daripada ahli-ahlinya (mandat) maka kerajaan menolak dan terus ditentukan elauh-elauh yang berkenaan dipotong. Apabila pegawai-pegawai kerajaan mengadakan jawatankuasa tindakannya maka suara-suara keluar hendak mengadakan perjumpaan am akhirnya berkesudahan pemimpin jawatankuasa tindakan ditahan kerajaan. Orang di luar kerajaan hanya memerhati

sahaja lalu mengatakan inilah kerajaan demokrasi dari rakyat.

Akibat daripada potong gaji pegawai-pegawai kerajaan dari sehari ke sehari makin nampak. Perniagaan malap – kerana perniagaan malap maka tiap-tiap perusahaan pun malap – dan kenderaan am pun malap. Kedai-kedai makan yang besar kurang peerniagaan hampir-hampir sebanyak lima puluh peratus. Jualan di tepi-tepi jalan yang biasanya ramai orang makan di sana baharu pukul 8 atau 9 malam telah sunyi. Semua perusahaan mengeluh. Apakah ini kelak tidak berkesudahan makin bertambah orang-orang yang tidak bekerja? Akibat tak ada kerja banyak sulit Bung!

\* \* \*

Dato' Razak telah menuduh orang-orang PAS dan parti “menjajah” ke Terengganu dan Kelantan kerana di negerinya ia tidak boleh berjaya. Menjajah itu kata setengah-setengah orang erti yang menakluk dan menguasai di tempat-tempat ini. Tetapi adakah mereka menguasai di sana? Adakah Nabī Muhammad, Abū Bakr, ‘Umar, ‘Uthmān dan ‘Alī serta sahabat-sahabat yang lain yang berhijrah ke Madinah itu menjadi penjajah kerana ia di sana dicalonkan untuk menjadi pemerintah? Baik-baik Bung!

\* \* \*

Pejabat Agama Selangor dikatakan telah memerintahkan kepada kadi-kadi supaya jangan menikahkan seseorang wanita keturunan bangsawan (Raja) dengan orang-orang kebanyakan. Jadi kalau tengku-tengku tidak mau kahwin sama-sama keturunannya tentunya banyak kelak janda tua ataupun kalau perempuan-perempuan daripada keturunan Raja. Selain daripada ini apakah nampaknya perasaan *kafā'ah*<sup>2</sup> hendak diperkuatkan? – Perintah Raja Bung!

\* \* \*

Tuan Haji Ali *Chief* Kadi bilang tidak memadai hanya mengislamkan orang tetapi orang yang Islam itu tidak diajar. Benar Tuan Haji Ali – buktinya Jam'iyyah banyak Islamkan orang tetapi ia tidak mengadakan kelas untuk orang-orang muallaf itu belajar agama – apakah ia tidak hanya menambah banggungjawab<sup>3</sup> sahaja sedang kewajipan tidak ditunaikan? Walhasil selagi di Jam'iyyah.....selagi apa Bung – tanya kepada

Cemeti al-Farouk

<sup>1</sup> Pengulangan dalam teks

<sup>2</sup> Merujuk kepada hal sekufu.

<sup>3</sup> Kesalahan ejaan teks. Perkataan sebenar ‘tanggungjawab’.